

Na osnovu člana 138. stav (3) Zakona o radu ("Službene novine Federacije Bosne i Hercegovine", broj 26/16, 89/18 i 44/22), člana 77. stav (3) Kolektivnog ugovora za službenike organa uprave i sudske vlasti u Federaciji Bosne i Hercegovine („Službene novine Federacije Bosne i Hercegovine“, broj 98/23), Vlada Hercegovačko-neretvanskog kantona, koju zastupa Ministar pravosuđa, uprave i lokalne samouprave Goran Karanović uz saglasnost gradova i općina: Grad Mostar, Općina Jablanica, Općina Pozor-Rama, Općina Ravno i Samostalni sindikat državnih službenika i namještenika u organima državne službe, sudskoj vlasti i javnim ustanovama u Federaciji BiH kojeg zastupa predsjednik Sindikata Samir Kurtović, dana 3.2024. godine zaključuju

## **UGOVOR**

### **o pristupanju Kolektivnom ugovoru za službenike organa uprave i sudske vlasti u Federaciji Bosne i Hercegovine**

#### **Član 1.**

Ovim ugovorom Vlada Hercegovačko-neretvanskog kantona pristupa Kolektivnom ugovoru za službenike organa uprave i sudske vlasti u Federaciji Bosne i Hercegovine („Službene novine Federacije Bosne i Hercegovine“, broj 98/23), (u daljem tekstu: Kolektivni ugovor).

#### **Član 2.**

Samostalni sindikat državnih službenika i namještenika u organima državne službe, sudskoj vlasti i javnim ustanovama u Federaciji BiH, kao reprezentativni sindikat, prihvata pristupanje Vlade Hercegovačko-neretvanskog kantona, kao poslodavca Kolektivnom ugovoru.

#### **Član 3.**

Ugovorne strane su saglasne da se upotrijebljeni izrazi u odredbama Kolektivnog ugovora koji se odnose na parlamentarnu proceduru, Vladu Federacije Bosne i Hercegovine, federalne organe državne službe, službenike sudske policije, federalne ustanove i druge federalne institucije imaju primjenjivati i tumačiti kao odredbe koje se odnose na ove ugovorne strane i na skupštinsku proceduru, Vladu Hercegovačko-neretvanskog kantona, kantonalne organe državne službe ili organe i tijela uprave, upravne organizacije i druge kantonalne institucije i gradske i općinske službe za upravu.

#### **Član 4.**

Prihvatanjem Kolektivnog ugovora, ugovorne strane su saglasne da će se prava i obaveze izvršavati na način kako je utvrđeno Kolektivnim ugovorom, s tim da se od primjene izuzimaju:

- (1) U članu 22. stav (3) riječi: „jednom godišnje“.
- (2) U članu 24. stav (4), a primjenjuje se:  
Najniža plaća u organima državne službe utvrđuje se u visini od 60-70 % prosječne neto plaće isplaćene po zaposleniku u FBiH po posljednjem objavljenom statističkom podatku Federalnog zavoda za statistiku.
- (3) U članu 24. stav (6) riječi: „uz obavještenje sindikatu“.

Navedeni izuzeci od primjene Kolektivnog ugovora iz člana 4. ovog Ugovora odnose se isključivo na kantonalne organe državne službe.

### **Član 5.**

U slučaju promjene fiskalnih zakona u Federaciji Bosne i Hercegovine doći će do izmjena i dopuna ovog Ugovora o pristupanju Kolektivnom ugovoru za službenike organa uprave i sudske vlasti u Federaciji Bosne i Hercegovine.

### **Član 6.**

Ovaj ugovor stupa na snagu danom potpisivanja od strane ovlaštenih predstavnika ugovornih strana, a objavit će se u „Službenim novinama HNK“.

### **Član 7.**

Stupanjem na snagu ovog Ugovora o pristupanju Kolektivnom ugovoru za službenike organa uprave i sudske vlasti u Federaciji Bosne i Hercegovine („Službene novine Federacije Bosne i Hercegovine“, broj 98/23) prestaje da važi Kolektivni ugovor za službenike organa uprave i sudske vlasti u Federaciji Bosne i Hercegovine („Službene novine FBiH“ broj: 6/20, 11/21 i 5/22), i („Službene novine HNK“ broj: 2/20, 1/21 i 2/22).

### **Član 8.**

Ugovor je sačinjen u osam istovjetnih primjeraka, pri čemu svaka ugovorna strana zadržava po četiri primjerka ugovora.

Za Vladu  
Hercegovačko-neretvanskog kantona  
  
Ministar pravosuđa, uprave i lokalne  
samouprave

Za Samostalni sindikat državnih službenika i  
namještenika u organima državne službe, sudskoj  
vlasti i javnim ustanovama u Federaciji BiH

Predsjednik

dr.sc. Goran Karanović

mr. Samir Kurtović

Dana: 09.04.2024. godine

Dana: 09.04.2024. godine

Broj: 01-1-02-774/24-1

Broj: 01-495/24